


趙氏族譜

友山甫鈔
卷參易冊

紀肝誌下

民國庚申孟秋

裔孫趙輔仁



趙氏族譜

後世子孫什襲如珍藏之

調鶴山房續修

肝誌下。

行狀。

嗚呼痛哉。府君竟棄不孝。維義而長逝焉。不孝生不能養志。以博親歡。歿不能盡哀。以供子職。斯亦已矣。夫復何言。維是府君一生苦志。撫子成家。不容泯沒。爰和淚濡和墨略陳梗概。以備

當代大人先生。垂慈採擇焉。府君姓趙氏。諱恒豫。號泰安。原籍江南鳳陽人也。始祖鐸。自宋以來。屢仕南詔清平官。十九世祖諱瓚。明成化丙午科舉人。弘治庚戌科進士。官至兩淮鹽運司副使。生子三。士元。士英。士吉。士元生子六。鏞。鏜。鐸。鎬。鑾。金。鑾生五子。曰端益。明萬曆壬午科舉人。任四川蓬溪縣知縣。陞湖南沅州知州。兩地皆有生祠。事蹟備載郡志。次曰端莘。端升。端臨。端巽。府君即端巽公之九世孫也。五世祖暄。邑增廣生。同里沙村舉人。李春茂。往受學焉。至祖考其華公。忠厚為人。渾樸其性。生子一。即府君也。府君自幼孝友成風。甫十齡。先大父即貿易順寧一帶。未便托身還鄉。時祖母李孺人。在家撫育府君。稍長。即命府君前往省親。始進去年餘。

而先大父卒於順寧。府君無力返柩。權厝於客邸。喪畢歸家。三年後先大母為府君娶楊氏。月餘而楊氏即卒。越二年而先大母又去世。斯時也。滯滯孑立。形影相吊。外無期功強近之親。內無應門五尺之童。幸蒙族祖邑庠生例贈徵仕郎魯山公。同從九品職銜廷信公。高議着府君移居市上街。代為料理家務。而府君亦小心勤慎。夙興夜寐。克儉克勤。遂蒙丁酉科選拔進士。二族叔香山公。復為府君繼娶李氏。至是始有家有室。然府君常以父母不得親見為憾。至癸丑年不孝生。府君喜出望外。以為七大支中。不致乏嗣一支矣。府君撫視不孝。恩義兼至。既為不孝謀生理。復為不孝謀家室。於庚午年為不孝完婚嚴氏。府君又以不孝艱於嗣息。再為不孝置側室某氏。生女一。前先母李孺人棄養時。府君命不孝喪葬如禮。凡附身附棺。莫不各循其分。終制仍命不孝營謀生易。幸蒙天祖默佑。稍獲餘贏。於不數年間。立墓誌。買墳地。製田產。置居室。此皆府君平生勤儉之所致。一以光先人之面目。一以立後人之根基。俾不孝得以享現成之福。是以門閭光大。尚幸數年來。年登耄耋。而體益康強。去歲為府君祝嘏。蒙

慈禧皇太后萬壽之期。普天大慶。承地方選拔耆英。得以賞賜恩賚壽官。頂戴榮身。不孝私心竊喜。以為府君精神矍鑠。俾不孝膝下瞻依。得遂烏私之願。庶以報深恩於萬一也。孰意

詔書特下。始受

皇恩。不月餘。竟以頭暈微疾。遂溘然而長逝耶。嗚呼痛哉。府君性情古直。勤儉一生。終日終夜。勞瘁不辭。待親戚始終如一。處鄉鄰和順可風。能識正人君子。則親近之。能知匪僻小人。則絕遠之。雖未嘗讀書。其通情達理。遠勝常人。而賦畀天質。誠暗與古人相合德也。嘗謂不孝曰。做人當以節儉為本。起家宜以知人為要。乃言猶在耳。竟成治命耶。嗚呼痛哉。原配前妣某氏。性情和順。能知四德三從。亦有賢媛風焉。無出先府君卒。而今不皆復見矣。府君生於嘉慶戊寅年。十月二十日吉時。卒於光緒丙申年。正月初五日辰時。享年七十九壽。生子一。即不孝維義。娶同里處士嚴公某女。側室某氏。生一女。幼未字。不孝苦塊昏迷。語無倫次。伏冀當代大人先生。賜之誄銘。以光泉壤。世世子孫。感且不朽。

光緒丙申二十二年正月下澣吉日。

不孝。維義泣血稽顙。謹述。

例授修職郎。丙子科副貢進士。候銓儒學教授。族姪。福綏。葛菴氏。填諱。

。前清旌表百歲民國壽媛趙母周太孺人墓表。

夫人所可必者德也。而不可必者壽也。雖然德者壽之徵。壽者德之報也。觀於周太孺人。而愈信之矣。孺人氏周。漆麟公次女。即留東學界所稱周老人。華國翁之堂姊也。自幼知禮。稟姆教維謹。及笄歸我趙公榮品時。家計艱窘。翁姑又衰。且病。榮品公因棄詩書。事鹺業。然利微。弗克自給。孺人辨色而興。殘燈而息。紡績之聲。達旦不輟。如是以佐甘旨者。垂數十年。孺人無倦容。亦無怨言也。翁性嗜酒。嘗飲至夜分。狂呼不已。孺人慮以醉傾仆。恒扶掖之。安寢乃退。迨逝世。髻髻致哀。蘋蘩致潔。雖所生幾以加之。其相夫也。則桓少君之挽鹿也。其教子也。則韓夫人之丸熊也。以故冢男名列於園橋。仲男譽施於黌序。振振繩繩。融融洩洩。洵極天倫之樂事矣。而尤可豔羨者。則壽而康也。且夫沈魚落鴈。容非不麗也。五言三絕。才非不工也。然而鮮聞其壽也。壽矣。計不過六七十耳。否則八九十耳。至於百年。蓋千萬中。不得其一二焉。況求其精神矍鑠者哉。孺人乃以期頤之年。猶能部署家政。鉅細靡遺。微大德曷克臻此。前清大吏具狀疏請旌之。報曰。

可。或謂其以人為瑞。特吾國相沿之慣例耳。旌否固無關係。不知泰西之所最重者。德育體育也。匪獨男子為然。即女子亦然。今者女學日興。而其德育有如孺人之完備者乎。其體育有如孺人之健全者乎。甲南曩遊扶桑。畧總其國俗民情。如孺人之德之壽者。又豈但吾國所僅見也哉。蒙故表而出之。以誌來者。

夫族姪孫。

甲南冠三氏。頽首拜撰。

受業門孫。

秉鴻。竹廷甫。頽首拜書。

民國壬子元年吉旦。

孝男。福蔭。立石。

。例授文林郎。鄉評文謹。副貢進士。來五族兄先生墓表。

來五族兄。醇謹士也。性坦白。無機心。貧而好學。至老不倦。弟子從之者甚眾。人呼為來五先生。年七十八。以疾卒於家。及葬。厥嗣請為文以表之。溫與來五同族。趙氏以鐸為鼻祖。歷二十二傳。而分為七支。來五為第三支。端益公之九世孫。溫為第一支。端蒙公之九世孫。輩相若。而來五長於溫十八歲。其少壯時事。蓋未及知之矣。然居相近。兩家往來甚密。溫既冠後。常以文字相過從。朝夕討論不絕。又以其餘間得聞其少年時事。則來五族兄之為人。舍溫其誰知哉。兄諱福綏。號來五。又號葛菴。世居太和之喜洲。郡庠生魯山公之孫。丁酉選拔進士。香山公之侄。而郡庠生璧田公之冢子也。少聰穎。七歲即熟習四子書。一日。五伯考康侯孝廉公。以非禮勿視四句屬對。兄隨口以必得其位數句應之。時伯祖考秀峯太守公。致仕家居。聞而勉之。曰。子能非禮勿視聽言動。自能必得其位祿名壽也。厥後學業大進。應童子試時。年甫十一齡。人皆以神童目之。旋補博士弟子。

員。攷優等嘖嘖有聲。庠序間人。皆謂其飛騰有日矣。不意滄桑之變。地方罹於兵燹者十八年。而一時文人學士。遂皆沉淪於干戈擾攘中矣。豈獨兄一人哉。雖然兄之遭遇。尤有足悲者。方變亂之始。舉室遠奔。搶掠一空。而上有老親。仰事為急。兄以孱弱文人。苦身竭作。溷跡魚鹽。勉供甘旨。時而跣足遠行。時而肩挑背負。其焦瘁之形。見之者幾有不識。無何而璧田公及楊太孺人。皆先後淪謝。其胞弟盛五。又逾年而歿。當是時。饑饉薦臻。亂靡有定。諸子侄皆幼稚。嗷嗷待哺。兩家弱小。兄皆以一身任之。甚至耕不足繼之以商。商不振。又以課蒙續之。輾轉相尋。無復有寧居之日。昔杜工部詩有云。世亂年荒事業空。其時事可想而知矣。厥後王師克復大理。地方稍稍安戢。兄曰。吾不屑與市井爭利。吾讀書人。行讀書事。分也。前此之為。乃不得已耳。自是一意課讀。口講指畫。昕夕不遑。人稱為經師人師。乃難猶未已。而兄之繼娶何孺人。遂中道而殂。遺一子。亦不數年而殤。兄自是遂孑然一身矣。雖其間食廩餼。貢明經。中副車。亦似有剝極而復之望。然年衰老。不復有可為。真所謂困則真困。亨未盡亨也。又計其生平遭

回祿者再。喪偶者三。皆極人世所不堪之境。而兄則聽天安命。不怨不尤。其事親也。則以患難而益孝。其待姪也。則以窮困而益篤。其處境也。則貧若原思。而介如靖節。其悼亡。則情情類潘岳。而達如莊子。語曰。達人知命。兄真知命哉。嘗記其晚年喪子時。年已五十餘矣。溫勸之。再續絃。以圖嗣。兄答曰。枯楊豈能生梯哉。且年將就木。縱得子。亦未能目覩其成立矣。乃天誘其衷。不絕其後。再娶李孺人。果連生二子。其長子則繩曾也。既冠而婚。兄今且弄孫矣。異哉。居恒衣布食蔬。和平簡厚。不琢不彫。與人言剖心置腹。人或以其牽直而笑之。而兄始終不改。故人亦無有欺之者。他如修文宮而倡首。興義學以育才。逢善舉則踴躍爭先。應公事則採擇輿論。又其善之表見於鄉黨者也。年逾古稀。康彊猶昔。與之論古今事。津津有味。知其神明不衰。去歲冬月。偶染微疾。溫往視之。猶正襟危坐。談笑自如。固無痛苦之容。亦無悲傷之意。竊冀勿藥有喜。乃不逾月而即以疾終矣。傷哉。夫以兄之才。與兄之學。苟早歲時逢清泰。何難掇高科。膺厚祿。享富貴於一世。乃天既阨以兵難。又中以坎坷。致令一世清才。運蹇數乖。阨抑

困窮。僅僅以老壽而終。嗟乎。溫為先惜。且為兄悲。溫為文以表之。以俟後之攷德者。

乙亥 恩科舉人。前任雲南府易門縣教諭。調補順甯府雲州學正。族弟景溫。頓首拜撰。

大清宣統二年。歲次庚戌。夾鐘月。上澣黃道吉日。

○皇清例貤贈文林郎。邑庠彥。享七十壽。少卿堂兄先生墓誌。

生人不朽有三。曰德。曰言。曰功。而三者之中。德尤重。得於身之謂德。德之至者。非聖賢不能。然德之範圍甚廣。固不必奇節卓行也。苟大綱無虧。行己有恥。亦有足稱焉。若堂兄少青者。可以誌矣。兄諱景仰。字少青。號月坡。世居葉榆之史城。蓋三十有餘傳矣。自始祖鐸。奏相業於唐。瓚公繼美於後。端益公肇青紫於明。越七傳而我伯祖興安郡伯秀峯公出。則我趙氏之族愈滋大矣。祖考華峯公。為秀峯季弟。以次子辛亥 恩科舉人。保山縣教諭。二伯考申之公貴。贈文林郎。生子三。伯考新園公居長。新園公亦生三子。堂兄少青其第一子也。生而聰穎異常。四歲即能背誦唐詩。然

身弱多病。父母不甚督責。至丙辰亂起。兄年已十五矣。隨兩伯考及先考。避亂至雲縣。伊時溫僅六齡耳。亦雇人襁負而至。猶記兄在亂離中。侍奉諸父。循規蹈矩。儼若成人。迄今思之。覺幼輩子弟中。如兄之恂恂者。又何人也。壬申赴鶴慶應試。獲補弟子員。其後每逢科舉。族戚勸之應試。輒以親老不欲遠離之辭。蓋其人至孝性生而名心又淡。故一心只知愛親。富貴之說。固不足以動之矣。庚辰伯考新園公棄世。景星景雲兩堂弟。均貿易在外。惟兄一人親視含殮。一切附身附棺。竭力周備。詎意尚未得出葬。而比鄰不戒於火。夜中無法呼救。兄撫棺跪哭。號聲動地。幸而得免。自時厥後。兄益淡視世事。覺此身亦可有可無矣。其居鄉也。從不與人爭競。一言之發。慎之又慎。猶恐見罪於人。故問之宗族。宗族不能指其非。詢諸鄉里。鄉里不能言其咎。晚年無子。有勸以置側室者。則曰。此乃天事。非人力所能強。況我有諸姪。亦猶子也。烏見其無子乎。嗚呼。其明大義如此。以視第五倫之待姪。猶足多焉。兄為人恬淡。又好氣節。家貧舌耕以度日。絕不干求於人。半世而自得自樂。然治家最儉。故一生清苦。而一日未嘗困乏。

其待諸弟也。友愛備至。間有意見未合。諸弟或盛氣相爭。兄則和容悅色以解之。以故家庭之中。融融洩洩。雖終身猶如一日。至己亥。兒子甲南在家授讀。兄命之續修家譜。凡世系之繁衍。先代之事蹟。父兄之傳聞。且遺文之散失無傳者。兄猶能記之。一一指示。蓋其身。猶及聞先祖伯叔餘論。故言之確鑿如此。其詳也。按兄一生。居心曠達。立品清潔。洵可謂能自樹立。不染流俗者矣。先生於道光辛丑年五月十九日亥時。卒於宣統己酉元年十月二十四日辰時。享七十壽。原配嚴孺人。繼配張孺人。均無出。以胞弟景星子宗仁承嗣。從兄志也。謹擇期於十一月二十七日。葬兄於弘圭山麓祖塋之次。嗚呼。天地不老。善人無後。德之所在。其誰能沒。溫雖不聞。用敢拭泪摛管。以誌不朽云爾。

勅封文林郎。乙亥。恩科舉人。知縣用。前任易門教諭。堂弟。景溫。頓首撰。

調補雲州學正。

宣統元年。歲次己酉。黃鐘月。下浣。黃道。

穀旦。

孝男宗仁立石。

○○皇清。例授武毅將軍。鄉評果恪。趙公宜之大人。墓表。

自史遷立義俠傳。世多非之。厥後肝膽之士。湮滅無聞。澆薄之風。遍於里巷。說者謂。去古愈遠。風氣愈薄。吁。豈古今人。不相及歟。胡相判若斯。則亦非作史者之咎。而後世不尚氣節。有以階之厲也。觀於宜之族兄。而知之矣。族兄生而壯健。長臂廣額。膽識過人。學書不成。去而學劍。人謂其有古豪俠風。溫生不幸。少歷戎馬。間遇烽火。輒驚。而族兄談笑殺賊。無畏縮態。蓋其天性然也。其從軍也。邑中少年。及旁近縣。賢豪皆從之。卒能以少擊眾。所到輒有功。總兵官悉信任之。然能趨人之急。以德報怨。嘗語人曰。從軍而魚肉鄉里。非丈夫也。以故全活甚眾。鄉里德之。值軍功保案。膺厚爵者比比。而族兄以五品終。其為人賢不肖何如也。其居鄉里也。折節為儉。厚施而薄望。遇人有患難。長太息者。久之能以身任人之事。而身亦卒未嘗受人之報也。他如不伐其能。不歌其德。諸所當施。惟恐見之。振人不瞻。先從貧賤始。謂非朱家郭解之流亞歟。語云。不學無文。固可以訕下流。而不可以譏烈士也。丙午。溫司雲陽鐸任。時族兄客遊雲陽。朝夕過從。相

與以道故為笑樂。英姿然爽。溢眉宇間。鄉人有落魄者。則從而憫恤之。有急難者。則從而排解之。嗚呼。緩急人之所時有也。如族兄者。赴人之困厄。言信行果。所得不已多乎。族中惟溫與族兄相知最深。族兄卒後。效曾請表於溫。溫謹按其生平事跡。有類義俠者。特表而出之。以勵後人。

乙亥

恩科舉人。知縣用。前任順甯府雲州學正。族弟景溫。子和氏。

顓首拜撰。

皇清例封武毅將軍。鄉評果恪。享年六十四壽。顯考趙公宜之府君行狀。

嗚呼痛哉。府君竟棄不孝。效曾紹曾等。而長逝耶。不孝等生不能承歡菽水。病不能營治醫藥。歿不能如禮喪葬。積孽叢愆。百身莫贖。夫復何言。但念府君生平嘉言懿行。有不容泯沒者。爰和淚濡毫。泣陳梗概。以備

大人先生採擇焉。府君姓趙氏。諱福遐。字宜之。號遠峯。世居雲南大理郡北之喜臉。始祖諱鐸步公。唐初為南詔蒙氏清平官。歷傳俱載仕籍。逮十世祖諱瓚公。登明進士。累官南京兩淮鹽運副使。七世祖諱端益公。以孝廉知湖南沅州知州。政績攸著。崇祀鄉賢。至曾大父諱振翺公。生子三。長諱良品。次諱新。品三。即先大父諱元品。公有隱德。生子一。即府君也。府

君生之前夕。先大父夢熊入室。心異之。謂先大母曰。亢吾宗者。其此子乎。越丙辰。杜逆倡亂。時府君年甫十齡。慷慨語曰。治亂何常。徒憂無益。賊勢雖熾。久自當殲滅耳。聞者奇之。後丁卯。府君從總戎楊公。勦撫迤西各地。方親冒矢石。勇敢當先。凡所區劃。楊公皆首肯之。壬申。大兵集郡城下。府君聲言勸眾曰。大丈夫為國出力。苟依依性命。何以得見昇平。於是麾軍勇入東門。雖幾殞命。然郡城由此恢復。元凶由此而成誅矣。復至順寧城。亦因激於忠義。身帶重傷。幸得太醫調治。獲愈。明年癸酉。蒙總督部堂劉公具摺保奏。旋奉旨。賞戴藍翎。著以守備。儘先補用千總。府君因念大難已平。烽煙既息。釋凱旋家。奉侍父母。人偕謂其忠孝之志。至此兩全。而府君則以為盡所當為而已。當是時。府君雖身膺公事之餘。然素行廉潔。官囊無餘錢。不獲已往雲陽貿易。以供父母之滌瀝。至己卯。先大父物化。府君哀毀骨立。痛不欲生。後以家境稍裕。為先大母祝壽。鄉里間執酒稱觥者。踉蹌濟濟。亦一時盛事也。壬辰。先大母辭世。凡附身附棺。無不如禮。大事畢。府君謂不孝等曰。吾事畢矣。而今而後。一切家政。汝弟兄其